

Ն. Ս. Օ. Տ. Տ. ԳԱՐԵԳԻՆ Բ. ԱՄԵՆԱՅՆ ՀԱՅՈՑ ԿԱԹՈՂԻԿՈՍԻ ՊԱՏԳԱՍԸ՝
ԱՄՆՏ ԷԶԻԴԻՈՅԻ ՀԱՄԱՅՆՔԻ ԿԱԶՄԱԿԵՐՊԱԾ ՄԻՋԵԿԵՂԵՑԱԿԱՆ
ԱՂՈԹՔԻ ԺԱՄԱՆԱԿ

(Հոռմ, 7 հոկտեմբերի, 2021 թ.)

Յանուն Հօր եւ Որդւոյ եւ Հոգւոյն Սրբոյ. ամէն:

*Ձերդ Սրբութիւն սիրեցյալ եղբայր Ֆրանցիսկոս Պապ,
Ձերդ Ամենասրբութիւն Տիեզերական պատրիարք Բարդուղիմէոս Ա.,
Մեծազնիւ տիկին Մերկել՝ Գերմանիայի կանցլեր,
Ի Քրիստոս սիրելի՛ քույրեր եւ եղբայրներ,*

Փրկիչ մեր Տերը, Վերջին ընթրիքի ժամանակ գիտենալով, որ ժամեր անց պիտի չարշարվեր ու խաչվեր, Իր աշակերտներին տվեց հրաժեշտի պատգամը. «Խաղաղութիւն եմ թողնում ձեզ, իմ խաղաղութիւնն եմ տալիս ձեզ. ձեզ չեմ տալիս այնպես, ինչպես այս աշխարհն է տալիս. ձեր սրտերը թող չխռովվեն եւ չվախենան» (Հովհ. ԺԴ. 27):

Մեր Տեր Հիսուս Քրիստոսի խաղաղության պարգեւը, որ նա թողեց Իր աշակերտներին շուրջ երկու հազար տարի առաջ, այսօր մեզ է տրված բաշխելու քսանմեկերորդ դարում ապրող քրիստոնյաներին եւ բոլոր մարդկանց հատկապես այս օրերին, երբ բռնութիւններն ու պատերազմները, էթնիկ խտրականութիւնն ու կրոնական ծայրահեղականութիւնը եւ դրանց հիմքի վրա իրագործվող ոճրագործութիւնները տակավին ավերներ են գործում, եւ աշխարհը կարիքն ունի խաղաղության ու ապահով կյանքի վերահաստատման:

Մեր Տեր Հիսուս Քրիստոսի խաղաղութիւնն այլ է այս աշխարհի խաղաղութիւնից, որը հաճախ կառուցվում է նաեւ անարդարության հիմքի վրա՝ ցավ ու վիշտ բերելով մարդկանց եւ ժողովուրդներին: Փրկչի շնորհած խաղաղութիւնը Աստուծո սիրառատ ներկայութիւնն է մեր կյանքում, որի համար եւ մեր Տերը քայլեց խաչի ճանապարհով եւ անմահացող սիրով իր զոհաբերութեամբ բացեց բաղձալի խաղաղության հնարավորութիւնը մեզ համար: Այս է վկայում առաքյալը՝ ասելով. «Առանց

Աստծու էիք աշխարհում: Իսկ այժմ, Հիսուս Քրիստոսի միջոցով, դուք, որ մի ժամանակ հեռացած էիք, մերձավորներ եղաք Քրիստոսի արյամբ, որովհետեւ նա է մեր խաղաղությանը, որ իր խաչով հաշտեցրեց Աստծու հետ, քանզի թշնամությունը սպանեց իր խաչով» (հմմտ. Եփ. Բ. 12–16):

Սիրելիներ, միջկրոնական եւ միջմշակութային համաժողովի ավարտին մեր քննարկումներն ու խորհրդածությունները եզրափակում ենք միասնական աղոթքով Կոլիգեոմում, որը դարեր առաջ դարձավ քրիստոնյա նահատակների առ Աստված ապավինության եւ սիրո վկայության վայր, Քրիստոսի խաղաղության ու մարտիրոսաց զորավոր հավատքի ողջագուրման վկայարան: Այստեղով՝ խորհրդանշական այս վայրով է ձգվում վաղ քրիստոնեության խաչի ճանապարհը՝ հազարավոր մարտիրոսների ու վկաների արյունով սրբագործված, որն այսօր ամենքիս առաջնորդում է խաղաղության մասին քրիստոնեական ընկալման վերարժեւորմանը: Նահատակության արյամբ պսակված այս վայրում Քրիստոսի մարտիրոսներն ու վկաները չհուսահատվեցին անասելի չարչարանքներից, անձնատուր չեղան խաղաղության մասին այս աշխարհի պատկերացումներին, այլ իրենց արյան հեղումով հաստատուն պահեցին հավատարմությունն առ Աստված, ինչպես հռչակում էր Սուրբ Պողոս առաքյալը. «Ո՛չ մահը, ո՛չ կյանքը, ո՛չ հրեշտակները, ո՛չ իշխանությունները, ո՛չ այլ բաներ, որ այժմ կան, ո՛չ գալիքները եւ ո՛չ զորությունները, ո՛չ բարձրություն, ո՛չ խորություն եւ ո՛չ մի ուրիշ արարած չի կարող բաժանել մեզ Աստծու այդ սիրուց, որ կա մեր Տեր Քրիստոս Հիսուսով» (Հռոմ. Ը. 37–39):

Մենք գալիս ենք մի երկրից, որտեղ Ամենակալի նախախնամական ձեռքով պատմության ընթացքում ամեն մի քարի ու ավազահատիկի մեջ խտացվել է քրիստոնեական վկայությունը, խաչի ճանապարհը՝ հանուն Հարության ու հավատի հաղթանակի, որտեղ լեռներն աղոթքի ամենագոր ուժով վերածվել են խաչքարերի, դաշտերն ու բլուրները՝ սրբազան խորանների, լճերն ու գետերը՝ Մկրտության ավազանների՝ որպես հավատարմություն մեր քրիստոնեական հավատքի ու ինքնության: Ազգս հայոց լավ գիտի խաղաղության գինը, որ վճարել ու շարունակում է վճարել: Անցյալ տարի մեր ժողովուրդը վերստին անցավ խաչի ճանապարհով: Ազատ ու անկախ ապրելու իրավունքը, տերունաշնորհ խաղաղ կյանքը պաշտպանելու համար ազգիս զավակները կրեցին արհավիրքները Ադրբեջանի կողմից Թուրքիայի օգնությամբ եւ ահաբեկչական

խմբավորումների ներգրավմամբ սանձազերծված 44-օրյա պատերազմի: Մենք ցանկանում ենք մեր քույր Եկեղեցիներին, հանուն մեր ժողովրդի զավակների, Մեր երախտագիտությունը հայտնել, որ ինչպես պատերազմի օրերին հանդես եկան անարդարության ու եղեռնագործությունների դեմ, այնպես էլ, վստահ ենք, բարձրահունչ պիտի պահեն իրենց ձայնը՝ ընդդեմ արցախահայության անկախ ապրելու իրավունքի նկատմամբ բռնացումի, հանուն գերյալների ազատության եւ Ադրբեջանի վերահսկողության տակ հայտնված տարածքներում հայկական հոգեւոր-մշակութային ժառանգության պահպանման, հանուն տարածաշրջանում կայուն խաղաղության վերահաստատման:

Սիրելիներ, այսօր առաքելահիմն Եկեղեցիների ներկայացուցիչներս համախմբվել ենք մեր Փրկչի՝ Հիսուս Քրիստոսի ներկայության մեջ՝ մեր Եկեղեցիների աղոթքներն ու ջանքերը համախմբելու եւ ողջ մարդկությանը հանձնառության կոչելու՝ պահելու աշխարհը «յերկիր խաղաղութիւն, ի մարդիկ հաճութիւն» ընթացքի մեջ՝ զերծ ատելությունից, թշնամանքից ու հակամարտություններից: Կոլիզեոմի պատմական այս վայրում քաջության եւ անվեհերության պատգամն է փոխանցվում ամենքիս՝ առաքյալների ու աշակերտների նման անհողողող անցնելու խաղաղության առաջնորդող խաչի եւ վկայության տերունահաստատ ուղիով: Այս տեսլականով եւ միասիրտ աղոթքով հայցենք Տիրոջ օգնականությունը խաղաղ ու արդար աշխարհ կերտելու դժվարին ճանապարհին:

Թող Աստծու շնորհը, սերը եւ խաղաղությունը լինեն ձեզ՝ ամենքիդ հետ, հավիտյանս, ամեն:

